



# Gouvernman i atantif a soufrans son pep

**D**epi ler LDS in pran pouwar lannen pase dan en moman ekstrememan difisil, gouvèrnman in angaz li pour diminyen lenpakt sa resesyon ekonomik ki nou pe pas ladan lo son sitwayen. Prezidan avek son lekip i konsyan difikilte ki plizyer fanmir pe pas ladan me i annan en lot realite ki pa bokou dimoun i kontan koz lo la: pei osi pe fer fas avek en sitiasyon ekonomik tre difisil. Se pour sa rezon ki gouvèrnman in oblize vir ver Fon Moneter Enternasyonal. Dan tousala Sesel i bezwen reste dan en pozisyon kot i kapab revey son bann det domestik e enternasyonal. Gouvèrnman i bezwen balanse ant kwa ki i kapab kontinyen soutenir e kwa ki i pour nepli kapab.



*Ansyen gouvèrnman ti evite pran okenn aksyon lo pri tiket bis, akoz zot ti irresponsab e pa kapab pran desizyon*

Pour bokou lannen leta in depans bokou larzan pour soutenir en servis esansyel dan pei – sa se transpor piblik. Pri pasaz dan bis piblik pa'n sanze pour bok-

ou lannen e gouvèrnman ti pe sibvansyon sak tiket bis par apepre 50 pousan. Diskisyon pour revwar pri bis ti'n komanse depi avan nouvo gouvèrnman vin o-pouwar me ansyen gouvèrnman ti pe ezite pou pran okenn aksyon. Avek kondisyon ekonomik aktyel, gouvèrnman in oblize revwar sa dosye e pran desizyon pour ogmant pri bis dan en fason pour parsyelman koup depandans lo bidze leta. Pour gouvèrnman sa ti en desizyon tre difisil me absoliman nesese.

Aprè ki desizyon in ganny pran, gouvèrnman in reste atantif anver reaksyon son pep, sirtou bann ki deza dan serten difikilte finansyer. Aprè en peryod lekout, gou-

vernman in deside ki pri bis pour reste 10 rroupi a tou moman konpare avek 15 rroupi dan letan wikenn. Sa i a anmenn en soulazman pour bann ki bezwen obligatwarman vwayaze dan wikenn pour al travay.

Lo lot kote, gouvèrnman in osi revwar fiks penalti pou parking sorti 1000 rroupi pour vin 500 rroupi. Sa i vin apre ki gouvèrnman in pran kont difikilte ki egziste aktyelman pour en drayver ganny en landrwa pou park son transpor dan lavil. Gouvèrnman in demontre, ankor enn fwa, ki i reste atantif e pe touzour ekout son pep; sirtou ler bann desizyon i annan en lenpak direk lo zot standar lavi.



*Gouvèrnman dirize par Prezidan Ramkalawan in angaz li pour diminyen lenpakt sa resesyon ekonomik lo son sitwayen*

# Move desizyon le pase in met pei an retar

**L** ekip Prezidan Ramkalawan i enn ki pran desizyon. Evidaman, pa tou desizyon ki gouvènmant i pran ki pou popiler. Apre tou, gouvènmant i bezwen pran desizyon ki dan lentere nasyonal en non pa bann avek karakter popilis. Enn nou problem ozordi se lefe ki ansyen gouvènmant pa'n pran bokou desizyon ki ti tre nesese pour pei. Zot in plito konsantrè lo bann desizyon popilis ki ozordi pe kout pei ser.

Nou annan legzanp 'Air Seychelles'. Zot in sibvansyon sa lakonpanyen lannen apre lannen san en plan mannyer pour fer li vin profitab. Ozordi gouvènmant pe bataye pour kapab



*Ansyen gouvènmant parti US pa'n pran bokou desizyon ki ti tre nesese pour pei, legzanp 'Air Seychelles' kot zot pann negosye repeyman son det.*

sov sa lalinny aeryen ensi ki travay bann anlwaye Seselwa. I annan bokou. Ansyen Minis Dugasse, en ansyen anlwaye sinyor 'Air Seychelles' pa ti onte dir dan zot konferans de pres ki gouvènmant LDS ti devret antre an diskisyon avek bann investiser etranze o-size 'Air Seychelles' depi le 25 Oktob lannen pase. Kestyon se: akoz ki ziska le

24 Oktob ler US ti ankor o-pouvwar zot pa ti antre dan negosiasyon? Larepons i senp: US ti napa en plan mannyer pour fer 'Air Seychelles' transformen pour vin en lakonpanyen ki kapab soutenir son lekor.

Keksoz pli alarman se lefe ki Msye Jacquelin Dugasse in aksepte pou dir depi lontan bann profesyonnèl ti pe

konsej gouvènmant pour ogmant kontribisyon Fon Pansyon akoz avek kontribisyon aktyel, sa fon pa soutenab. Annou pa oublie ki Msye Jacquelin Dugasse ti tyermenn Fon Pansyon pou plizyer lannen. Erezman in sorti akoz si i ti reste, bokou Seselwa ti pour napa en pansyon alavenir.

Zot pe konplent sitiasyon 'Air Seychelles' e byento zot pour konplent logmantasyon dan kontribisyon pansyon e lefe ki pansyon pou bezwen ganny pran a en laz pli avanse. Anmenmtan, zot in aksepte pou dir lontan zot in ganny konsej pour enplimant sa bann mezir me zot pa'n pran okenn aksyon.

Sa bann zans in met pei an retar akoz zot pa'n pran desizyon ler ti devret. Erezman Seselwa in donn LDS en loportinite pour pran bann deizyon brav e bouz sa pei devan kot tou Seselwa a kapab benefisyè.

## 'Zour nou vin dan gouvènmant': ki sa zour ?



**S**a trwa mousketer sorti dan parti US pe vin deplizanpli agasan. Zot nepli annan nanryen pou dir e pe senpleman abiz zot privez lo televizyon nasyonal. Tou dernyèman, zot pe fer bann deklarasyon ki zis fer riye.

Zot nouvo fraz prefere se: 'zour nou vin dan gouvènmant'. En etranze ki pa konn listwar politik Sesel pou krwar sa trwa gamen i fek form en parti politik e zannen zot in deza dan gouvènmant.

Msye Dick Esparon in fer en prezantasyon animen lo

kwa ki zot pou fer dan sekter lagrikiltir zour zot vin dan gouvènmant. In fini bliye pou dir zot fek sorti dan gouvènmant 10 mwan pase e sitiasyon lagrikiltir dan Sesel i en refleksyon lafason ki US in administre sa sekter pour sa dernyen 40-an e plis. Msye Dick in oublie ki move zesyon later lagrikiltir in anmenn nou kot nou ete ozordi. In osi bliye pou dir sete anba rezim US ki prodiksyon lavyann lokal ti preski aret net akoz zot ti'n les lavyann enporte anvai marse lokal e preski tou laferm prodiksyon zannimo ti bezwen fermen. Son memwar i vremen kourt.

Msye Dugasse osi in koz lo zot plan zour zot vin dan gouvènmant vizavi kontribisyon Fon Pansyon. I ti tyermenn i pa'n fer nanryen. Ozordi zour, zot annan tou bann pli bon plan. Tou sa letan zot ti napa. Ki zot ti pe fer ?

Zot latitud mangonnen pou kontinyen. Msye Herminie pe konplant akoz Komisyoner Lasante pa pe donn zot permisyon fer zot kongre. Zot vwar sa koman viktimizasyon. Zot in oublie ki i annan plizyer parti politik Sesel enkli LDS ki ti bat zot dan dernyen eleksyon. LDS osi pankor fer son konvansyon me person pa pe konplent. Petet zot krwar en kongre ki pou fer zot vin dan gouvènmant. Konmdir kreol : be kan ?